

**Месяца ианнуария в 5-й день
Преподобного Симеона Псково-Печерского
На велицей вечерни
Блажен муж: 1-й антифон.
На Господи, воззвах: поем стихиры, глас 1.**

Подобен: Небесных чинов радование:
Яко древо многоплодное, во обители Печерстей преподобием процвел еси,
отче Симеоне преблаженне, елеем трудов житие твое умастив, радуяся, в
селения райская преставился еси, и достойная потов твоих приемлеши
воздаяния.

Измлада божественную мысль приемь, страхом Божиим оградил еси себе,
отче Симеоне богодухновенне. Темже, иночества узкий путь избрав, чистаго
жития твоего доброту показал еси и послушания явил еси образ.

Незлобием и кротостию украшаемъ, любовь Христову стяжал еси, отче
Симеоне богоприятне, еюже первозданный в человекех образ зря, души многия
ко спасению привел еси, от древняго змия лукавства тех ограждаяй.

Слава, глас 6:

От дальняго к горнему промыслом Божественным свыше направляемъ,
телом к пещерам богозданным притекл еси, душею же на гору небесную
вознеслся еси: и нас ускори к восхождению на высоту духовную, Симеоне пре-
подобне отче наш.

И ныне, Богородичен, глас тойже.

Вход. Прокимен дне. И чтения 3 преподобническая.

На литии стихиры самогласны, глас 4:

Тленныя мира сего красоты убежал еси, будущих восприятия возжелев
сокровищ, и в тихое пристанище притекл еси, Симеоне, идже, постническое
течение скончав, дарований Божественных сокровище явился еси, и нам
благодать от мощей твоих источи, честное успение твое славящим.

Саровскому чудотворцу от юности подражая, того радость о Господе
стяжал еси и к людем велию любовь явил еси, Симеоне, светом благочестия вся
просвещая и подавая верным исцеления, темже радость духовную молитвами
твоими испроси всем, память твою святую совершающим.

Велию подвига иноческаго ревность показуя, в келлию пещерную зат-
ворился еси и тамо яко бесплотен пожил еси, Симеоне, от духов нечистых
стужения приемый, ныне же ангельского сподобився ликостояния, к
милосердию Божию с ними воззови о всех, любовию тя почитающих.

Слава, глас 8:

Земли Печерских проявление, сторицею плод умноживый, дар молитвы к
Богу стяжал еси, имже обилие плодов земных от земли неплодныя испросил
еси, напитав зело обитель твою, о Симеоне преславне, неплодствие душ наших
претвори, да сподобимся принести Господу достойныя плоды покаяния.

И ныне, Богородичен, глас тойже.

На стиховне стихиры, глас 5.

Подобен: Радуйся, живоносный Кресте:

Радуйся, преподобне Симеоне, источниче чудес неисчерпаемый, всем, с верою к тебе взывающим, был еси безмездный врач и скорый помощник, недуги душевныя разрешая и болезни телесныя утоляя, темже и ныне честныя мощи твоя струи исцелений источают неоскудно: моли Христа ниспослати нам велию милость.

Стих: Честна пред Господем/ смерть преподобных Его.

Радуйся, преподобне Симеоне, воздержанием плотския страсти в себе умертвив, власть на духи нечистыя от Бога приял еси и человекогубителя посрамил еси, егда постом, молитвою и смирением козни вражия разоряй, души страждущия свободжал еси, темже моли Человеколюбца даровати душам нашим велию милость.

Стих: Блажен муж, боялся Господа,/ в заповедех Его восходит зело.

Радуйся, преподобне Симеоне, мирен дух и сердце чисто стяжав, пророческаго сподобился еси дара и тайновидец предивный явился еси, премудростию Божию озаряешь, многия от бед избавил еси и неврежденны от пагубы сохранил еси, и ныне моли Христа Бога даровати душам нашим мир и велию милость.

Слава, глас 6:

Бренныя славы бегая, венцем нетленным увенчался еси, и смирением украсився, велие дерзновение пред Богом стяжал еси, Того непрестанно моли, Симеоне, даровати нам прегрешений оставление, во еже спастися нам.

И ныне, Богородичен, глас тойже.

На благословении хлебов, тропарь святаго дважды, и Богородице Дево: единожды.

Тропарь, глас 1:

Любовию Христовою сердце твое уязвивый, евангельски Тому последовал еси: яко древний подвижник преподобием украсивыйся, славный насельник обители Богоматери у пещер Богом зданных явился еси, и, благодать духовную свыше приемь, подаеши верным исцеления, Симеоне богоблаженне, не престай молитися о чтуших тя.

На утрени

На Бог Господь: тропарь святаго, дважды.

Слава, и ныне, Богородичен гласа.

По 1-м стихословии седален, глас 8.

Подобен: Повеленное тайно:

Благодатию свыше осиянныи, пастырь добрый явился еси, преподобне Симеоне, и, велие попечение о чадех твоих прилагаяй, ограду пажити духовныя твоя неврежденну соблюл еси, темже и нас представльством твоим сохрани и овцам избранным Христова стада молитвами твоими сопричи.

Слава, и ныне, Богородичен:

Пресвятая и пренепорочная Дево, у Креста возлюбленного Сына Твоего явилася еси всем христианом Мати Преблагая, темже к Тебе, упование наше, в скорби душевней припадаем, вопиюще: простри матерски руце Твои ко Престолу Владычню и молися, Пречистая, о душах наших.

По 2-м стихословии седален, глас 3.

Подобен: Дева днесъ:

Во обители Пречистыя труды монашеския смиленно понесл еси, Богородицу любовию немолчно песнословя, сего ради, отче Симеоне, еще на земли сый, собеседник избранный Божия Матере явился еси, ныне же, у Престола Царя славы предстоя, со Владычицею Небесною не престай молитися о спасении душ наших.

Слава, и ныне, Богородичен:

Явилася еси в скорбех утешение и в бедах Предстательница, Заступница еси обидимым и ненадеянным надежда, темже Тя, яко упование спасения нашего по Бозе стяжавше, в молении сердечнем к Тебе припадаем и усердно молимся: всенепорочная Дево, со угодником Твоим Симеоном, помози спастися душам нашим.

Величание:

Ублажаем тя, преподобне отче Симеоне, и чтим святую память твою, наставниче монахов и собеседниче Ангелов.

По полиелеи седален, глас 4.

Подобен: Удивися Иосиф:

Приидите, вернии, ублажим святаго Симеона, иже, высотою дел в божественную доброту одеяся и сосуд небесных дарований явися, от негоже богатныя милости неоскудно приемлюще, верою и любовию взываем: радуйся, Симеоне, преподобне отче наш.

Слава, и ныне, Богородичен:

Радуйся, Пречистая, архангельский глас слышавшая, Слова бо неизреченного вместилище и рождества несказанного Мати, безсловесие душ наших разреши, да устнама радости по достоянию восхвалим Тя: радуйся, Царице небеси и земли, Тобою бо всякаго зла избавляемся.

Прокимен, глас 4: Честна пред Господем/ смерть преподобных Его.
Стих: Что воздам Господеви о всех,/ яже воздаде ми. **Всякое дыхание:** Евангелие от Матфея, начало 43.

По 50-м псалме стихира, глас 6:

Днесъ светлаго торжества радование и душам нашим веселье бывает: нового бо молитвенника тя пред Богом обретаем, преподобне отче Симеоне, пещера убо отверзеся, и гроб не удержа чудоточных мощей твоих сияние, имже озаришася вси вернии, в светоносный день прославления твоего сошедшися, темже вкупе небесная и земная веселия всякаго исполняются, и Господь во святых Своих прославляется.

Канон преподобному, глас 8.

Песнь 1

Ирмос: Колесницегонителя фараона погрузи, чудотворяй иногда Моисейский жезл, крестообразно поразив, и разделив море, Израиля же беглеца, пешеходца спасе, песнь Богови воспевающа.

Днесъ в доме Пречистыя сошедшеся, вернии, Духом Божественным веселящеся, преподобного Симеона восхвалим, той бо всем житием своим

непрестанно песнь Богови воспевал еси.

Яко семя на ниве веры истинныя в вертограде Пренепорочныя Жизнодавцем насажден быв, плод добрый сторицею принесл еси и множества верных напитал еси, песнь Богови воспеваяй.

Благими нравы измлада украшен, заповедей Божиих искусный делатель был еси и, око сердечное, взирающее к Богу, имея, отче Симеоне, Божественных даров и чудес исполнился еси, песнь Богови воспеваяй.

Богородичен: Богородительнице всенепорочная, всем верою исповедающим Тя на всяком месте и покланяющимся Твоему святому образу, моли Сына Твоего, Христа Бога нашего, избавление даровати от страстей и бед, песнь Ему воспевающим.

Песнь 3

Ирмос: Утверждай в начале небеса разумом, и землю на водах основавый, на камени мя, Христе, заповедей Твоих утверди, яко несть свят, паче Тебе, едине Человеколюбче.

Весь прилежа Вседержителю, преподобне отче Симеоне, Тому прилепился еси от юности, и нас верных чад твоих, научи похваляти Святую Троицу: несть свят, паче Тебе, едине Человеколюбче.

Любовию Божественною укрепляемь, отче наш Симеоне, чудотворцу Саровскому последовал еси, и ныне вкупе с ним и всеми святыми воспеваши: несть свят, паче Тебе, едине Человеколюбче.

Страсти плотския умерщвляя, отче Симеоне, душу обогатил еси Божественными дарованьми, и сими множество к тебе притекающих уврачевал еси, научая тех пети: несть свят, паче Тебе, едине Человеколюбче.

Богородичен: К Тебе, Богородице всепетая, прилежно притецем, недостойная чада Твоя, грешний и смиренний, и припадем, в покаянии зовуще из глубины души: Владычице, молитвами угодника Твоего преподобного Симеона, сотвори спастися нам, вопиющим: несть свят, паче Тебе, едине Человеколюбче.

Седален, глас 4:

Страстей умерщвляя волчцы, отче Симеоне преславне, душу твою, яко землю доброплодную, возделал еси и потом многих болезней и трудов обильною орошая, давидски процвел еси, яко крин райский, сего ради тя величаем.

Слава, и ныне, Богородичен:

Молю Тя, Пречистая Мати Бога вышняго, едино души моя утешение, упование, сладoste, Божественный покрове, светe, заступление и спасение! Сподоби мя Твоими молитвами услышати глас, внутрь чертога Владыки верных призывающий.

Песнь 4

Ирмос: Ты моя крепость Господи, Ты моя и сила, Ты мой Бог, Ты мое радование, не оставь недра Отча и нашу нищету посетив. Тем с пророком Аввакумом зову Ти: силе Твойей слава Человеколюбче.

Душу твою очистив, преподобне отче Симеоне, храм Святаго Духа соделался еси и, в подвизех добре подвизаяся, горнее Царство наследовал еси.

Сего ради Прославльшему тя вопием: силе Твоей слава Человеколюбче.

Будущее твое прозрев, отче Симеоне, блаженный Корнилий Крыпецкий, манной Божественных словес тя напита и на пажить духовную постави. Ты же, познав сию сладость, радостно вопиял еси: силе Твоей слава Человеколюбче.

Многоболезненными страстью одержимым, отче пречудне Симеоне, даровал еси исцеления силою благодати Христовыя, юже стяжал еси изрядными делами твоими. Темже с тобою вопием: силе Твоей слава Человеколюбче.

Богородичен: О, Пресвятая Владычице, всех праведных удобрение, и дворе словесных овец, во уделе Печерстем боголюбиваго Симеона под честным Твоим омофором взрастившая и воспитавшая, не остави нас, рабов Твоих и моли Сына Твоего и Бога нашего, да спасет души наша.

Песнь 5

Ирмос: Вскую мя отринул еси, от лица Твоего Свете Незаходимый, и покрыла мя есть чуждая тьма окаяннаго: но обрати мя, и к свету заповедей Твоих пути моя направи, молюся.

Светом незаходимым осияваемъ, отче пресветле Симеоне, возсиял еси на земли яко солнце, чада твоя к познанию истины провождая и к свету заповедей Христовых пути тех направляя.

В стадо овец духовных преподобномуученика Корнилия пришел еси, отче наш Симеоне, и вся земная отвергнув, возшел еси на небо, взывая к Богу: к свету заповедей Твоих пути моя направи.

Ныне в выших селениих обитая, чад твоих назираеши, преподобне отче Симеоне. Темже научи и нас богоприятными твоими молитвами взвывать Господу: к свету заповедей Твоих пути наша направи.

Богородичен: Радуйся, Дево Всечестная, мосте, к небесем преводяй, и лествице высокая, ко Христу нас возводящая. Темже, Всепетая, яко Матернее дерзновение к Нему имущи, исцели ума моего омрачение и пути моя исправи, молюся.

Песнь 6

Ирмос: Очисти мя Спасе, многа бо беззакония моя, и из глубины зол возведи, молюся: к Тебе бо возопих, и услыши мя, Боже спасения моего.

Умом очищенным от помышлений лукавых, блаженне отче Симеоне, в молитве непрестанней пребывая и, яко светильник горя, взывал еси ко Господу: из глубины зол возведи мя, Боже спасения моего.

Обновив послушанием Христу душу твою, отче священне Симеоне, в великий образ облекся еси и, в пещеру Лазаря прозорливца вселившись, тому подражал еси, взывая: услыши мя, Боже спасения моего.

Крепостию духа, отче Симеоне, превозмогая державу вражию, подвизался еси внити сквозе тесныя врата. Темже в обители Отца Небеснаго вселился еси со умилением взвывая: слава Тебе, Боже спасения моего.

Богородичен: Не престай ходатайствовать о нас, рабех Твоих, Пречистая, якоже Господь с Тобою быти изволи, и от бед и скорбей избави ны, молящихся Сыну Твоему и воспевающих Бога спасения нашего.

Кондак, глас 6:

Яко Божия любве зерцало, во обители Печерстей благодатно просветился еси, образ иноческаго жития показуя, трудолюбием и послушанием на высоту добродетелей востекл еси. Темже, дары Духа Святаго от Господа почтенный, чудеса многа щедро источаеши, преподобне отче наш Симеоне, моли спасиша душам нашим.

Икос:

Духа Святаго сиянием просвещся, вся, яже в мире необинуяся оставил еси, блаженне, многими труды плоть покоривый духу, к высоте достигл еси безстрастия, сице, благоплодие души твоей добродетелей деяниемъ являй, истинную любовь к людем стяжал еси и благодать целений от Бога приял еси. Темже и по преставлении твоем дары чудес обогащенный, помошю твою нас не оставляеши, преподобне отче наш Симеоне, моли спасиша душам нашим.

Песнь 7

Ирмос: Божия снисхождения огнь устыдеся в Вавилоне иногда, сего ради отроцы в пеци радованною ногою, яко во цветнице ликующе, пояху: благословен еси Боже отец наших.

Водою живою жаждущих напаяя, отче наш Симеоне, яко истинный пастырь словесных овец, юже почерпал еси у Жизнодавца Христа, благодарне взывая: благословен Бог отец наших.

Краснейшее прозябение, преподобне отче Симеоне, в дому Божием прозябл еси, и, в молитвах болезнуя о чадех твоих, ихже Пречистая тебе вручи, с верою Богу вопиял еси: благословен еси Боже отец наших.

С небесными лики предстоиши, богоблаженне отче Симеоне, Престолу Пресвятыя Троицы, с ними купно и со всеми святыми непрестанно воспевая: благословен еси Боже отец наших.

Богородичен: К Кому возопию, Владычице, аще не к Тебе, Заступнице усердней рода христианскаго, Ты бо Отроча рождши, пребезначальное Слово, обеташвия грехом обновила еси и пети научила еси: отец наших Боже благословен еси.

Песнь 8

Ирмос: Седмерицею пеци халдейский мучитель, богочестивым неистово разжже, силою же лучшю спасены сия видев, Творцу и Избавителю вопияше: отроцы благословите, священницы воспойте, людие превозносите во вся веки.

Облецьтесь ныне людие, чтущий память Симеона достохвального, в милосердие, благость, смиренномудрие, кротость, долготерпение, снисхождение, подражающе Христу, Егоже отроцы благословите, священницы воспойте, людие превозносите во вся веки.

Нищетою духовною обогатился еси, преподобне отче Симеоне, иноком и всем приходящим к тебе образ любве Христовы быв, Егоже отроцы благословите, священницы воспойте, людие превозносите во вся веки.

Троичен: Троицу Единосущную, Нераздельную, Неслиянную и Пребезначальную днесь верний почтим, Юже отроцы благословите,

священницы воспойте, людие превозносите во вся веки.

Богородичен: Источник неисчерпаемый воды животныя, от потопа греховнаго мир спасшая, Дево Пренепорочная, страсти души моей потопи и прохлади сердце мое острупленное грехми, да воспою Сына Твоего, Егоже отроцы благословляют, священницы воспеваают, люди превозносят во вся веки.

Песнь 9

Ирмос: Ужасеся о сем небо, и земли удивишася концы, яко Бог явися человеком плотски, и чрево Твое бысть пространнейшее небес. Тем Тя Богородицу, Ангелов и человек чиноначалия величают.

Преподобне отче Симеоне, яко истинный пастырь овец Христовых, ныне дерзновение имея ко Господу, назираеши стадо твое с горних высот, помози и нам внити во ограду небесную.

Преселился еси, отче наш Симеоне, от привременныя жизни, во обители Небесныя, идже со отцы святыми песнь победную воспеваеши, радуяся, темже и нас, с верою и любвию тебе поющих, от великих бед и скорбей избавити Христа умоли.

О, богоблаженне отче наш Симеоне, в жизни временней на земли не покорився страстем плоти, безстрастием, яко ризою, облекся еси и сослужитель Ангелов явился еси, темже умоли Христа Бога избавити нас от искушений.

Богородичен: Христа, Сына Твоего, умоли, Мати Дево, согрешений прощение даровати рабом Твоим, Тебе Богородицу воистину проповедающим, и светлости святых и веселия сподоби нас во Царствии Небеснем.

Светилен:

Днесъ светло празднует святая обитель твоя, юже честным житием и подвиги, яко звезда многосветлая, озарил еси, отче Симеоне, указя нам путь ко Христу, Иже есть Свет мира.

Слава, и ныне, Богородичен:

Пети Тебе сподоби, Дево Всесвятая, Свет бо невечерний от чрева Твоего возсия, и прогони мглу страстей моих, едина Всепетая.

На хвалитех стихирь на 4, глас 8.

Подобен: О, преславнаго чудесе:

О, богомудре Симеоне, от юности святым отцем подобяся, во бдениих, молитвах и постех труды с болезньми подъял еси, ангельским житием украсившийся и демонския полки устрашивый, муж совершен воистину явился еси, и ко святым Псково-Печерским причтен был еси, с ними же за ны Христа Бога молиши.

О, предивне Симеоне, веры несомненная стяжателью, исцелений Божественных сосуд тя знаем неиждиваемый, чудесы от Бога прославляем и от верных песнями восхваляем, молитвенник теплый днесъ возсиял еси, темже Престолу Христову предстоя, моли, даровати нам богатыя милости.

О, преблаженне Симеоне, винограда Христова прилежный делателю, яко отец чадолюбивый, тяготу дневную понесл еси, молитвою чад твоих ограждая и любвию души тех возгревая, был еси всем ко Господу путевождь, темже

монахов и мирских множество наставника тя непреложна почитает.

Слава, глас 8:

Чудес зарею облистаємъ, ныне явился еси, преподобне, Церкве Русския
украшение, обители Псково-Печерский торжество, монахов ликовствующее
пение и верных веселия глас. О, Симеоне, усердный наш ходатаю пред Богом,
моления наша скоро Ему принеси.

И ныне, Богородичен, глас тойже.

Славословие великое. И отпуст.

На Литургии

Блаженны от канона праздника, песнь 6-я на 4 и святаго песнь 6-я на 4. Прокимен, глас 7: Честна пред Господем смерть преподобных Его. Стих: Что воздам Господеви о всех, яже воздаде ми. Апостол к Коринфянам, зачало 176. Аллилуиа, глас 6: Блажен муж, бояйся Господа, в заповедех Его восходит зело. Стих: Сильно на земли будет семя его. Евангелие от Луки, зачало 24. Причастен: В память вечную будет праведник: